

REGIONAL NEWS BULLETIN

HEADLINES (MORNING)

- 1. Mizoram hmun hrang hranga Sazu puang chuan natna hrang hrang an put darh theih avangin mipuite fimkhur turin a hriattir.
- 2. State Tax Department hnuaia Quick Response Team chuan Mizorama dawr hrang hranga GST rate thar hmang lo mi 10 chuang manin a hrem nan pawisa an chawi tir.
- 3. Prime Minister Narendra Modia chuan nimin khan New Delhi ah World Food India a hawng
- 4. Defence Ministry chuan Hindustan Aeronautics Limited nen Light Combat Aircraft MK1A 97 lei turin inremna an ziaik.

<><><>

RODENTS

Mizoram hmun hrang hranga Sazu puang chuan natna hrang hrang an pu darh thei a, a bik takin Mizoramah Rannung seh (Scrub typhus) natna a pu darh nasa tih finfiah a ni a, heng sazu thah tumtu te chu kut lawnga khawih lo tur leh thuamhnawa sazu hrik a kai lohna tura fimkhur turin Pachhunga University College-a Department of Zoology-in a chah.

PUC Department of Zoology-a Vector borne disease research laboratory chuan thuchhuah siamin, Mizoram hmun hrang hrangah Sazu puang leh buh eitu an tam thu te, tur hmanga hrai tuma hma lakna a awm thute chanchinthar lamah a lang a, hemi chungchanga Pachhunga University College a thawkte leh khawvel ram danga mi thiamte zir chiannaa tarlan a nih dan chuan Sazu-te hian natna hrang hrang an pu darh thin a, a bik takin Mizoramah Rannung seh (Scrub typhus) natna a pu darh nasa tih finfiah a ni tawh tih an sawi a. Mizoram buh eitu sazute tura hrai emaw, thang hmanga awk emaw, silai leh hmanraw dang hmanga suat tumtute chu kut lawnga khawih lo tur leh thuamhnawa sazu hrik a kai lohna tura fimkhur turin an chah bawk a ni.

Heqalth Dept chuan thuchhuah siamin, tunlai hian Mizoram hmun hrang hrangah Rawthing (mau) tam vangin sazu a puang a. Lunglei district a Mamte leh Lungrang khuaah te, Serchhip district a Khawbel khuaah te leh hmun hrang hrangah chuan buh an seh chhiat vangin tura hrai te a ni bawk tih sawiin sazu in mihringa natna chi hrang hrang a thlen theih lakah mipuite in veng turin an hriatti ar.

Heng natna hrang hrang te lanchhuah dan tlangpui te chu:
khawsik
tha na
tihrawl na
chau
thalbe vung
pumna leh kawthalo
luak
ruhchuktuah vung leh na
taksa durh leh pan te a ni a, nunna atan a hlauhawm avangin a rang thei ang berin doctor hnai berah inentir tur a ni. Kai lo tura kan inven that a ngai a, In leh a vel vawn fai te, inchhung a sazu luh theihna tur kua leh awng tih phui te, ei leh in ningnawi paih na felfai tak siam leh sazu luh theih lohna tura siam te, thang/sazu ban kam te leh a tul chuan tur hman te a ni. A nung lai man emaw a thi kan khawih dawn a nih pawhin kut lawnga khawih loh tur a ni.

(Corr: Maremi)

<><><>

SWACHHATA HI SEVA

Swachhata Hi Seva hmalakna kal mek hnuaia Faina Hapta leh Faina Hnatlang runpui chu Mizoram hmun hrang hrangah huaihawt a ni a.

Aizawl ah chuan nimin khan MINECO Open Gym tualah neih niin UD&PA Minister K.Sapdanga'n a hmanpui a, Faina Hnatlangpui hi October ni 2 Pu Mahatma Gandhi pianchampha

thlenga neih tur niin "Ek Din, Ek Ghanta, Ek Saath" tia hming phuah a ni a, Minister Pu K. Sapdanga chuan veng, khawtlang, pawl, Zirna in te, kohhran leh sawrkar department anga Faina Hapta chhungin hma laho turin ngena a siam a. Faina Hapta khuh hawnnaah hian HDFC Bank chuan CSR Fund kaltlangin khawlaia bawhlawh hip khawmna lirthei - Garbage Vacuum Truck chu UD&PA Minister hnenah an hlan nghal bawk a ni.

Faina Hapta pual hian MLA leh Corporator te pawhin an bial chhungah hmalak an tum a. Hmalakna langsar zingah Aizawl West I bialtu MLA Pu TBC Lalvenchhunga chuan a bial chhungah Local leh Village Council te Faina Intihsiak a puang a. He intihsiaka titha te hnenah Swacch Bharat Diwas kharna October 2 a neih hunah Lawmman pek a tum a ni.

Tukina Faina beihpui hawn zawhah hian Hnatlang runpui hawnna atan MINECO huam chhungah hmun 4-ah hnatlang neih nghal a ni a, District dangah pawh Faina beihpui hi hawn a ni bawk.

Lunglei District Level Committee on "Swachhata Hi Seva 2025"-in a rel angin Lunglei DC Office chuan sawrkar office hrang hrang chu ram pum huap hma lakna hi zawm a, pisa tihfai ni atana hmang tur leh faina thutiam tiam tura hriattirna chhuahin, he hriattirna bawhzui hian Lungleia sawrkar office hrang hrang chuan an office leh a chhehvel an tifai a. Hemi rual hian faina kawnga hma la tur te, mi dang zirtir leh tihhmuhtu ni tur te'n an intiam nghal a ni.

September ni 17 atanga October ni 16 inkar chhunga 8th Rashtriya Poshan Maah hman mekah, hman khat daih sarang that lohzia leh bawhlhlawh thliar hran pawimawhzia inzirtirna, 'Awareness on Single-Use Plastic and Waste Segregation' chu vawiin khan hman ni bawkin, DPO leh CDPO staff-te bakah, Lunglei ICDS Project chhunga anganwadi worker-te chuan faina hnatlang an thawk a. Anganwadi Centre tinah thawktute leh naupangte'n faina hnatlang leh environment humhalh hnatlang an thawk bawk.

Swachata Hi Seva 2025 Campaign pualin Saitual District hmun hrang hrangah faina hnatlangpui neih a ni bawk a, Sawrkar pisa leh zirna in hrang hrang te tihfai a ni.

Saitual District-a khawtlang hruaitu VC te ruahmanna angin nimin zing khan vantlang hnatlang koh a ni a, vantlang ram, kawngpui dung te leh tui luan kawr te tihfai a ni a, hnatlang tura chhuak khawm mipuite chu section hrang hrang a thendarh niin, an chanpual theuh an tifai a ni.

Nimin vek khan sawrkar pisa leh zirna in hrang hrang te tihfai hnatlang neih a ni a, Ngopa RD Block leh Phullen RD Block-ah te pawh BDO kaihhruainain faina hnatlangpui hi neih a ni bawk.

(DIPR)

<><><>

GST REFORMS

State Tax Department hnuaia Quick Response Team chuan Mizorama dawr hrang hranga GST rate thar hmang lo mi 10 chuang manin a hrem nan pawisa an chawi tir.

Tun thla ni 22 atanga sorkar laipuiin GST rate thar hmang tura a tih angin Akashvani Aizawl palai chuan Aizawl bazara dawrkai hrang hrang a tlawh kual zingah rate thar zawm lo an la awm nual a, heng mite hian an bungrua te chu GST rate tihdanglam hmaa an lak anih avanga a ngaia la hralh chhuak an nih thu an sawi a, hetihlai hian GST rate thar hman anih ruala an thil zawrh titlawm nghal vek an awm bawk a, TS Drug Store nghaktute chuan Thawhtanni-a ram pum huapa GST 2.0 a taka hman tan anih atang khan GST tihhniamna an damdawi zawrh chu strip 1-ah zaa 7-in a man an tihnam vek tih sawiin, paracetamol, pum damdawi, zunthlum leh BP sang damdawi bakah thin damdawi te chu a man an tihhniam zinga mipuiin an lei nasat zual tih an sawi bawk.

Akashvani Aizawl zawhna chhangin State Tax Commissioner Pu HK Lalhawngliana chuan Quick Response Team dinin GST rate tih hniam hnua sumdawng an thil zawrh la ti hniam ve lo mi 10 chuang an man tawh a, heng mite hrem nan pawisa an chawi tir nghal zel tih sawiin, nitin complain a la lut reng a, theih ang angin Quick Response Team ten an bawhzui nghal zel a, GST registration nei dawr te an thlurbing phawt a, GST registration nei lo mipui nghawng sumdawng lian dangte pawh an thur chhuak leh tan mek tih sawiin heng mite hi GST registration ti turin an nawr a, an ti duh lo a nih pawn Suo moto hmangin registration an tih tir a, tun dinhmunah Mizoram pumah GST registration nei sumdawng 9000 atang sing 1 vel bawr an awm tih a sawi bawk a ni.

Tun thla tir khan State Tax Commissioner chuan thuchhuah siamin, sorkar laipui thupek anga tun thla September ni 22 atanga ram pumah GST rate thar hman hunah GST registration nei sumdawngte chu GST rate hniam takna bungrua te chu a man tihnam vek turin a hriattir a, a ti lote chu GST dan hnuaia Anti-Profiteering measure hmanga hrem theih an ni thu sawiin, mipuite chu rate hniam tûra ngaih hniam lova zuar/hralh an hriat te chu Taxation Office hrang hrangah complain turin a chah a ni.

(Corr: Maremi)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan New Delhi ah World Food India a hawng. Thusawiin PM Modia chuan India chu hnam hrang hrang awmna, mamawh leh tharchhuah tam tak awmna anih avangin food sector lamah chakna thuah thum a nei a ti a. Ramdang tan pawh sumrawn peipunna tur zau tak a awm thu a sawi a. Khawvelin mamawh khawp chaw ei tur a neih theih nan a thawhhlawk hle tih a sawi a. Kum 10 kalta chhungin India in chaw a thar chhuah chu nasa takin a pung a ni a ni a ti.

<><><>

DEFENCE

Defence Ministry chuan Hindustan Aeronautics Limited nen Light Combat Aircraft MK1A 97 lei turin inremna an ziaik. Heng thlawhna lei nan hian sawrkar chuang cheng vaibelchhe sing 6 leh sang 2 a seng dawn a. Heng zingah hian fighter 68 leh two seater 29 te an tel a. Kum 2027-28 atangin thlawhna hi lei tan a ni ang a, kum 6 chhunga lei zawh fel tur a ni.

<><><>

SEVA PARV

Mipui rawngbawl leh sawrkar inrelbawl na tha thupua neinin Prime Minister Narendra Modia hnuaiah ramchhungah hmasawanna tam tak thlen mek a ni. Tun tum Seva Parv hunah chuan Modia’n technology hmanga sawrkar rintlak, langtlang leh mitin huapa a siam dan tarlang ila. Mipui rawngbawl leh sum leh pai enkawl kawngah e-Governance ecosystem chu PM Modia chuan rawn siam tharin mipuite tan thil thar a rawn chingchhuak a. He a ngaihtuahna avang hian sawrkar inrelbawl na pawh mitin ban phaka hnuhhnaih a ni a. PM Modia chuan e-Governance chu a awlsam a, a thawk chak a, sum sen a tlem bakah environment tan a him a ni a ti bawk.

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 126-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.

(Newsonair)

<><><>